

Breytingatillögur borgarfulltrúa Sjálfstæðisflokksins við frumvarp að fjárhagsáætlun Reykjavíkur 2019

D-1 Tillaga um að Gagnaveita Reykjavíkur ehf. verði seld.

Lagt er til að Gagnaveita Reykjavíkur ehf. verði seld. Sala á nettengingum er hvorki hluti af grunnrekstri Reykjavíkurborgar né hefðbundnum grunnrekstri Orkuveitunnar. Söluandvirðið verði nýtt til að lækka skuldir og fjármagnskostnað í samstæðu Reykjavíkurborgar.

Greinargerð:

Miklir fjármunir liggja bundnir í dótturfélagi Orkuveitu Reykjavíkur; Gagnaveitunni. Félagið hefur vaxið með hlutafjárframlögum Orkuveitunnar og skuldsetningu og eru fjárfestingar frá upphafi verkefnisins yfir 30 milljarðar króna að núvirði. Gagnaveitan hefur ekki skilað hagnaði en starfar á samkeppnismarkaði í fjarskiptum. Borgarstjórn samþykkti þann 16. október 2012 að selja allt að 49% hlut í félaginu og var því haldið opnu að selja meira síðar. Þrátt fyrir þessa samþykkt borgarstjórnar hefur áfram verið fjárfest í verkefninu fyrir meira en 11 milljarða króna. Nú hafa liðið 6 ár og margir milljarðar farið í að þróa verkefnið enn frekar. Nær tuttugu ár eru síðan Orkuveitan fór að fjárfesta í nettengingum og síðan þá hafa öflugir aðilar í fjarskiptum búið til samkeppnismarkað. Það er því engin þörf á því fyrir þróun neytendamarkaðar í fjarskiptum að Orkuveita Reykjavíkur fóstri áfram þetta þróunarverkefni. Miklu nær er að borgin fari eftir eigin samþykkt frá árinu 2012 þegar borgarstjórn samþykkti sölu félagsins, líkt og hinir hluthafar Orkuveitunnar gerðu. Með sölunni væri hægt að minnka skuldir samstæðu borgarinnar umtalsvert en það er skynsamleg forgangröðun einmitt á þeim óvissutímum sem við erum nú á. Eins skiptis tekjur af sölu byggingarréttar eru ekki í hendi á næstu árum. Endurmat eigna hefur síðustu árin skilað borginni hagnaði upp á tugi milljarða. Ólíklegt er að sú þróun haldi áfram. Sú fimm ára áætlun sem er lögð hér til samþykktar gerir ráð fyrir óhóflegri skuldsetningu og tekjustofnum í botni. Sú leið að losa landfestar á Gagnaveitu Reykjavíkur og láta hana standa á eigin fótum myndi minnka áhættu í rekstri borgarinnar, lækka vaxtagjöld og stuðla að eðlilegu samkeppnisumhverfi á fjarskiptamarkaði.

D-2 Tillaga um að arðgreiðslum frá Orkuveitu Reykjavíkur verði ráðstafað til útsvarslækkana: Lagt er til að arðgreiðslum frá Orkuveitu Reykjavíkur verði að fullu ráðstafað til útsvarslækkana í Reykjavík. Útgjaldaauki verði fjármagnaður með aðhaldi í innkaupum, útboðum og hagræðingu í miðlægri stjórnsýslu.

D-3 Tillaga um lækkun fasteignaskatta á atvinnuhúsnaði úr 1,65% í 1,60%

Borgarstjórn samþykkir að lækka fasteignaskatta á atvinnuhúsnaði úr 1,65% í 1,60% þegar á árinu 2019. Minnkun á hagnaði borgarinnar af fasteignasköttum á atvinnuhúsnaði við þessa breytingu er 430 milljónir 2019, 478 milljónir 2020 og 309 milljónir 2021. Minnkun á hagnaði verði mætt með forgangsroðun á verkefnum borgarinnar, hagræðingu í miðlægri stjórnsýslu, áherslu á útboð og aðhaldi í innkaupum.

D-4 Tillaga um viðmiðunartekjur til lækkunar fasteignaskatts og fráveitugjalds elli- og örorkulífeyrisþega:

Lagt er til að viðmiðunartekjur til lækkunar fasteignaskatts og fráveitugjalds elli- og örorkulífeyrisþega árið 2019 verði eftirfarandi:

Viðmiðunartekjur:

- I. 100% lækkun: Einstaklingar með tekjur allt að 5.000.000 kr. Samskattaðir aðilar með tekjur allt að 6.540.000 kr.
- II. 80% lækkun: Einstaklingar með tekjur á bilinu 5.000.000 til 5.600.000 kr. Samskattaðir aðilar með tekjur á bilinu 6.540.000 til 7.700.000 kr.

III. 50% lækkun: Einstaklingar með tekjur á bilinu 5.600.000 til 6.200.000 kr. Samskattaðir aðilar með tekjur á bilinu 7.700.000 til 8.640.000 kr. Lagt er til að skilyrði lækkunar fasteignaskatts og fráveitugjalds fari eftir reglum Reykjavíkurborgar um afslátt af fasteignagjöldum eins þær eru á hverjum tíma.

D-5 Tillaga um að skrifstofa eigna og atvinnuþróunar verði lögð niður:

Lagt er til að skrifstofa eigna og atvinnuþróunar verði lögð niður. Nauðsynleg verkefni skrifstofunnar verði færð undir framkvæmdir og viðhald á umhverfis- og skipulagssviði. Verkefnum sem almennt eru ekki á forræði sveitarfélaga verði komið í hendur einkaaðila. Lagt er til að fjárheimildir til skrifstofu eigna og atvinnuþróunar verði að fullu færðar til umhverfis- og skipulagssviðs, þó verði fjárheimildir lækkaðar sem nemur 100.000.000 kr. vegna stjórnkerfisbreytinga. Breytingin muni á næstu árum leiða af sér enn frekari hagræðingu með fækkun verkefna og aðhaldi í framkvæmdum. Lækkun útgjalda sem nemur 100.000.000 kr. verði ráðstafað á liðinn ófyrirséð.

D-6 Tillaga um úthlutun lóða fyrir fjölbreyttar húsagerðir:

Borgarstjórn samþykkir að úthluta fleiri lóðum undir fjölbreyttar húsagerðir í borgarlandinu og styrkja með því tekjuáætlun til 5 ára. Skrifstofu eigna og atvinnuþróunar (SEA) og fjármálaskrifstofu er falið að reikna út væntan tekjuauka og mögulega aukningu.

D-7 Tillaga um jöfn framlög úr borgarsjóði með börnum í leikskóla, óháð rekstrarformi:

Lagt er til að fjárheimildir skóla- og frístundasviðs verði hækkaðar um 107.664.861 kr. svo unnt verði að veita jöfn rekstrarframlög úr borgarsjóði með hverju barni sem lögheimili á í Reykjavík og sækir þar leikskóla. Þannig fylgi sama upphæð opinbers fjár hverju barni inn í leikskóla, óháð rekstrarformi viðkomandi skóla. Útgjaldaauki verði fjármagnaður af liðnum ófyrirséð.

D-8 Tillaga um jöfn fjárframlög úr borgarsjóði með börnum í grunnskóla, óháð rekstrarformi:

Lagt er til að fjárheimildir skóla- og frístundasviðs verði hækkaðar um 289.001.000 kr. svo unnt verði að veita jöfn fjárframlög úr borgarsjóði með hverjum nemanda sem lögheimili á í Reykjavík, og sækir þar grunnskóla. Þannig fylgi sama upphæð opinbers fjár hverju barni í skólakerfinu, óháð rekstrarformi viðkomandi grunnskóla. Útgjaldaauki verði fjármagnaður af liðnum ófyrirséð.

D-9 Tillaga um aukin framlög til tónlistarskóla á viðkvæmum svæðum:

Lagt er til að fjárheimildir skóla- og frístundasviðs verði hækkaðar um 100.000.000 kr. svo unnt verði að styðja við tónlistarskóla á viðkvæmum svæðum. Útgjaldaauki verði fjármagnaður með hagræðingu á brúttókostnaði við miðlæga stjórnsýslu sem væri innan við 2%.

D-10 Tillaga um að mannréttindaskrifstofa verði sameinuð velferðarsviði:

Borgarstjórn samþykkir að mannréttindaskrifstofa Reykjavíkur verði sameinuð velferðarsviði og verkefni hennar flutt þangað. Þá er jafnframt lagt til að mannréttinda- og lýðræðisráð og velferðarráð verði einnig sameinað í eitt ráð: velferðar- og mannréttindaráð. Tillagan felur í sér hagræðingu og aukna skilvirkni í stjórnkerfinu. Auk þess felur tillagan í sér valdeflingu í verki og að styrkja og efla málaflokkinn enn frekar.

D-11 Tillaga um að auka tíðni þrifa á stofnbrautum:

Borgarstjórn samþykkir að auka tíðni þrifa á stofngötum úr tveimur skiptum í 4 í þeim tilgangi að draga úr svifryki. Þannig verði stofnbrautir þrífnaðar jafnoft og Vegagerðin þrífur þjóðvegi innan borgarinnar. Kostnaður vegna þessa er áætlaður um 26 milljónir króna. Til að mæta þessum aukna kostnaði er lagt til að hagrætt verði um 3% á skrifstofu borgarstjóra.